

# Prestasi ASB 2019 bukti kemampuan dana

Penganalisis lihat keupayaan jana pendapatan dalam pasaran mencabar mengagumkan

**Amanah** Saham Bumiputera (ASB) baru-baru ini mengumumkan agihan pendapatan 5.00 sen seunit dan bonus 0.5 sen seunit untuk 2019.

Ramai terkejut, namun ramai juga yang bersyukur kerana ASB masih mampu mengumumkan agihan pendapatan yang boleh dianggap memuaskan dalam persekitaran ekonomi mencabar ketika ini.

Prestasi pasaran saham tempatan yang mencatatkan lima kali pulangan negatif dalam tempoh enam tahun memberikan kesan langsung kepada pendapatan ASB yang memfokuskan hampir 70 peratus dananya ke pasaran saham tempatan.

Namun, keupayaan ASB menjana pendapatan untuk memberikan agihan pendapatan sebanyak RM9 bilion kepada 10 juta pelabur baru-baru ini sememangnya satu prestasi yang

boleh dibanggakan.

Pengurus Pembangunan Perniagaan Putra Business School (PBS), Prof Madya Dr Ahmed Razman Abdul Latiff, berkata secara logiknya ASB tidak mampu memberikan dividen berdasarkan prestasi pasaran sekarang, jika dipertimbangkan lebih 90 peratus pelaburannya adalah dalam negara.

“Dengan hanya 7.5 peratus pelaburan ASB di luar negara, memang sukar sebenarnya untuk ASB membuat agihan dividen dan bonus, oleh itu, keupayaan ASB membayar dividen dan bonus sebanyak 5.50 sen seunit adalah sangat mengagumkan,” katanya kepada media di Kuala Lumpur, baru-baru ini.

Sama ada rakyat tahu atau cuba menafikannya, persekitaran perdagangan global ketika ini sememangnya tidak sama berbanding 10 tahun hingga 20 tahun yang lalu yang dilihat lebih terkawal.

Sebelum ini, Malaysia adalah destinasi pilihan pelabur, sebaliknya kini negara agak ketinggalan berbanding ekonomi baharu muncul seperti Thailand dan Vietnam yang menawarkan kos operasi jauh lebih murah, terutama kos tenaga buruh.

Perang dagangan antara Amerika Syarikat (AS) dan China memburukkan lagi keadaan



apabila kebanyakan pelabur mengambil keputusan menangguhkan pelaburan kerana mengambil langkah berhati-hati berikutan ketidaktentuan dasar perdagangan kedua-dua kuasa sebenarnya.

Pelabur perlu sedar situasi itu menjelaskan pertumbuhan ekonomi negara dan seterusnya memberi kesan kepada keyakinan pelabur untuk melabur di negara ini menyebabkan kesan langsung kepada pasaran saham tempatan yang ketika ini masih dihimpit pulangan negatif sepanjang tahun.

Semua faktor itu saling berkait memberikan kesan langsung dan tidak langsung kepada pendapatan ASB yang melabur lebih 70 peratus dalam pasaran saham tempatan.

Penganalisis pasaran, Rusli

Abu Yakim, berkata kemampuan dan keupayaan ASB membuat agihan 5.50 sen seunit dalam kedudukan FBM KLCI yang negatif dan persekitaran mencabar dan getir cukup menarik sebenarnya.

Katanya, melihat peruntukan RM9 bilion yang disediakan untuk agihan kepada 10 juta pelabur ASB itu sudah membuktikan kemampuan dana itu bukan calang-calang.

“Peruntukan yang besar dan saiz pelabur meningkat. Ia memang mencabar bagi tabung ASB, tetapi apabila ASB mampu memberikan agihan sebanyak itu bermakna rizab nilai aset bersih (NAB) ASB berada dalam keadaan selesa, walaupun pasaran tempatan malap dalam beberapa tahun kebelakangan ini,” katanya.



**Keupayaan ASB membayar dividen dan bonus 5.50 sen seunit adalah sangat mengagumkan.**

**Ahmed Razman Abdul Latiff,**  
Pengurus Pembangunan  
Perniagaan PBS